



Synfocity = 868

mail us at : mzsynfo@gmail.com; mizoramsynod@gmail.com - Phone - 2314648

November 24, 2022

- ❑ **Synod Executive Committee (SEC) vawi 299-na**

Nov. 23, 2022 (Nilaini) chawhma dar 10 khan Synod Executive Committee vawi 299-na chu Synod Office-a JM Lloyd Hall-ah an thu. Meeting hi Synod Moderator Rev. Dr. Vanlalngbaka Ralte-in a kaihrui a, Synod Secretary Rev. Z.D. Lalhmachhuana'n report a pe.
Meeting-ah hian thu ngaihtuah tur agenda 9 chhawpchuah a ni a, thurel tur zingah Synod Office Superintendent ruat chungchang te, Coordinator awmna (Department) siamrem chungchang te, Doctor, Super Specialist hlawh fukna/thutna leh Recruitment Rules Schedules-a telh rawtna te, Family Guidance & Counselling Centre (FG&CC) Kaihruiaina enthat thu te leh Kohhran Inpumkhatna chungchang ruahmanna te chu a langsar zualte an ni.
SEC meeting-ah hian Aizawl chhung atangin 46 leh Aizawl pawn atangin 81, an vaiin member 127 an kal a. Vawiin (Nov. 24, 2022) hian SEC Vawi 300-na an thu chhunzawm leh a, Kum 2023-2024 Budget Estimate an thlirho ang a, kum 2022-2023 Additional Budget dilna ngaihtuah a ni baw k ang.
- ❑ **Aizawl Theological College (ATC)-in College Day vawi 57-na an hmang**

Nov. 18, 2022 (Zirtawpni) khan Mizorama Pathian Thu zirna inpui, Aizawl Theological College (ATC) chuan kum tina an lo tih thin angin College Day vawi 57-na lawmna hun an hmang. Covid hrileng avanga kum hnih lai kalphung pangngaia lawm theih a nih loh hnuah kumin hian kimchang zawka programme hman theih a lo ni ta a ni.
Synod Moderator, Rev. Dr. Vanlalngbaka Ralte-in inkhawm a kaihrui a. College Principal, Rev. Prof. Tlanghmingthanga'n programme hmangtute lawmna thu a sawi a, kum khat kaltaa ATC rawngbawlna peng hrang hrang report a pe baw k.
College Day speaker Rev. Dr. Lalchungnunga'n "Integrity: The Essential Quality" tih thupui hmangin thuchah a sawi a. ATC Male Voice leh ATC Zaipawlpui ten Pathian fakna hla an sa a, Rev. C. Zoramawia, Senior Executive Secretary, Mizoram Synod leh Rev. Z.D. Lalhmachhuana, Synod Secretary (Sr.) te'n Zirlai ti tha bikte hnenah lawmman an hlan a. Lawmman hrang hrang zinga ngaihhlut hlawh ber pakhat, Best Outgoing Student lawmman chu Lalfelkima, Khatla South hnenah hlan a ni.
Hun tawp lamah Prof. Lalrindiki Ralte, Dean, Post Graduate Studies chuan lawmthu a sawi a, Rev. Lalthangmawia, Synod Theological Education Board member chuan malsawmnain College Day lawmna hi a khar a ni.
College Day-ah hian ATC Faculty-in Literary Project an neih zinga lehkhabu pahnhna "Mizo Christianity" tih Saptaung ziah chu Rev. Dr. Vanlalngbaka Ralte, Synod Moderator chuan a tlangzarh a. He lehkhabuah hian Mizo Kristian-na ziarang leh kalphung kawng hrang hranga thlirna thuziak sawmhni leh paruk lai a awm a. Phek 350 a chhah niin Rs. 350/- man a ni.
Aizawl Theological College hi Mizorama Pathian thu zirna ding hmasa leh changtlung ber a ni a. Zirtirtu thawk nghet 27 awm mekin nghet lova thawk 5 an awm a. Office leh a chung hmunhma hrang hranga thawk hi a nghet leh ni bi-a rawihte nen mi 30 an awm thung.
BD Zirlai hi 112 an awm mek a, M.Th. zirlai 59, D.Th. zirlai 18 leh DCPC zirlai 5 an awm baw k. Tunah hian mi 194 in ATC-ah hian Pathian thu an zir mek a ni.
- ❑ **Hruaina Eng Channel**

Hruaina Eng Channel alo changtlun zel theih nan Synod Executive Committee (SEC) vawi 298-na thurel no. 115-na chuan Synod hnuiaia Department-ten tangkai zawka Hruaina Eng Channel an hman theih nan Department hrang hrangte Programme pawimawh mipuite en duh awm bikte chu Hruaina Eng Channel-ah chauh chhuah thin ni se, tiin a rel a ni.
- ❑ **Synod Mission Board leh ram pawn chet velna**
 - ◆ **Nepal Mission Field**

Nov. 19, 2022 (Inrinni) khan mi 7 Lal Isua zui turin an inpe.
 - ◆ **Jharkhand Mission Field**

Nov. 20, 2022 (Pathianni) khan Sikaripara Biak In chu Upa Zorammawia, Laipuitlang Kohhranin a hawng a. Biak In hmun hi Chhinga Veng Kohhran lei sak niin Pu Zothankhuma te chhungkuain Laipuitlang Kohhran kaltlanga an sak a ni a. Biak In saknaah hian Kohhran memberte pawh an hnatlang nasa hle.

Nov. 20, 2022 (Pathianni) khan mi 8 Lal Isua zui turin an inpe a, Roman Catholic aṅging chhungkaw khat (member 2) leh Believers Church aṅging chhungkaw khat (member 2) kan Kohhranah an inpe bawk.

◆ **Ramthar Campaign**

Nov. 26 & 27, 2022 hian Kolasib Diakkawn Bialah Ramthar Campaign nei turin Rev. R. Lalhmingsanga, Mission Board Secretary a kal ang.

□ **Praise On 2022**

Synfo leh Central KṚP buatsaih Praise On 2022 Mal zai intihsiakna chu Nov. 18, 2022 (Zirtawpni) zan khan result puan niin zawh fel a ni a. Final Round thlenna hmun Mission Vengthlang Presbyterian Kohhran Golden Jubilee Hall-ah Result puan leh lawmman sem nghal a ni a, Praise on 2022 atana thlan chu NI. Malsawmdawngzuali (Ms-i), Tlangnuam West a ni a, pahnihna chu NI. Lalramnunmawii (Mawitei), Durtlang niin, pathumna chu NI. R. Lalnunluangi (Tluangluangi), Laipuitlang te an ni. Praise on 2022-ah hian KṚP Branch hrang hrang aṅging mi 379 an tel a ni.

Pakhatna hian sum fai Rs 1,00,000/-, pahnihna Rs. 50,000/- leh pathumna hnenah Rs. 30,000/- theuh hlan an ni a, an pathum hian Citation leh Trophy hlan tel vek an ni bawk. Top - 10 zinga mi 7 te chu Rs. 7,000/- theuh leh Citation hlan an ni vek bawk.

Result puan zan hian Praise On 2016-a pakhatna NI. R. Lalrinmawii (Arini) leh pahnihna Tv. Zorinsanga Sailo te, Praise On Group Zai - 2017-a pakhatna Dam Veng Branch te, Praise On Band - 2018-a pakhatna Electric Vengthlang Branch te, Mizoram Synod Choir, Mission Vengthlang Band leh Praise on - 2022-a pakhatna te an zai a ni.

□ **Synod Bookroom Headquarters Building thar hawn a ni**

Synod Executive Committee (SEC) Vawi 252-na thurel No. 41-in Synod Bookroom Headquarters Building sak that tura a lo rel chu tluang taka a sak hna te kalpui chhoh a nih hnuah hawn tura peih niin Nov. 24, 2022 (Ningani) chhun dar 12:30 khan Rev. Dr. Vanlalnghaka Ralte, Moderator, Mizoram Synod chuan Pathian hnenah hlanin a hawng.

Synod Bookroom Building thar hawn inkhawm hi Synod Bookroom building thar kawt zawla hman niin Rev. V.L. Luaia Hranleh, Executive Secretary, i/c PRESCOM etc. chuan a kaihrui a. Building thar sa tura hmalak chhoh a nih dan leh hmasawn chhoh dan bakah building sak a nih dan te Upa H. Ronghaka, General Manager, PRESCOM hnen aṅging ngaihthlak a nih hnuin Mizoram Synod Choir-ten Pathian fakna hla an sa a. Hemi hnu hian Rev. Dr. Vanlalnghaka Ralte, Moderator, Mizoram Synod chuan Synod Bookroom Headquarters Building thar chu a hawng zui ta a ni.

Synod Bookroom Headquarters Building thar hi Mizopa chhiara chhawng 6 niin a hnuai berah dawrtute tan Parking siam tel a ni a, hemi nena building pumpui chhuat zau zawng hi Square feet 27,680 zet a tling. Synod Bookroom Headquarters Building thar hian ban 34 neiin a dung sei zawng hi a sei lai berah feet 123 a ni a, a vang lam hi a zau lai berah feet 77 a ni bawk. A chhawng hnuai bera dawrtute tana lirthei dahna tur zau zawng hi Square feet 2,720 a ni a, hetah hian dawrtute tan lirthei ke hnih nei chi 24 leh ke pali nei chi 8 dah theih tura duan a ni. Kawngpui an-ah hian Headquarters Showroom dah a ni a, a zau zawng hi feet 123 a sei, feet 30-a zau niin India rama lehkhabu dawr lian pawl tak a ni pha.

Showroom chungah hian Bookroom dawr bungrua dah khawlna (Stockroom) chhawng hnih feet 100 a sei, a zau laia feet 77 a zau ve ve siam a ni a, Stockroom pum puia lehkhabu dah theih zat hi Cubic feet 21,400 lai niin Mizoram chhung leh pawna Synod Bookroom lehkhabu mamawh chu helai hmun aṅging hian pek chhuah a ni dawn a ni.

Stockroom chungah hian Synod Office an-in PRESCOM Department General Administration Office, Bookroom Office leh Committee Room a awm a. Office chungah hian Synod Canteen-II leh PRESCOM General Manager Quarters dah a ni a. A chhawng chungberah thawktu quarters Type V pahnih dah a ni bawk. He building thar danglamna chu basement leh a chung chhawng li, a vaia chhawng 5-ah hian Motor a tlan lut thei vek a ni.

He Building sakna bik atan hian Synod chuan Rs. 8,16,39,000.00 a ruahman a. Ruahman ang taka sak chhoh niin a building sak dan tur ruahmantu atan TBL Architechtrual Consultants, Khatla hman an ni a. A sak hna hi C.T Mawia Construction, Kolasib-in an thawk thung. Showroom-a lehkhahu chhuar hrang hrang siamtu atan Mawitea Timber & Steel Works, Ramrikawn rawih an ni a, Stockroom-a lehkhahu chhuar hi thir hmanga siam vek a ni a, hei hi K.L. Steel Fabrication, Mission Veng ten an thawk thung a ni.

Synod Bookroom Hqrs Building hmasa, 1978 kuma sak chu Nov. 23, 2017-ah thiah hna thawh tan niin July 17, 2018-ah a ban hmasa ber phun tan a ni. Ruahmanna hmasaah kum thum chhunga sak zawh tura ruahman ni mahse, Covid 19 hripui leng avangin a hun tura ngaihah peh hman a ni ta lova, Building hmasa thiah tan atanga kum 5-na chiah Nov. 24, 2022-ah Building thar hi hawn theiha peih fel a lo ni ta a ni.

❑ **FG&CC**

Nov. 19 & 20, 2022 khan Kristian Chhungkaw Seminar leh Campaign neiin Zawlnuam-ah FG&CC committee member te - Upa Denghmingthanga leh T.Upa PC Vanlalnunmawia te an kal.

❑ **KTP**

Nov. 23 - 24, 2022 chhung khan NEICCYA (North East India Christian Council Youth Assembly) chuan 'Youth Fest 2022' chu Union Christian College (UCC), Barapani, Shillong-ah an buatsaih a, hetah hian Central KTP aiawhin Committee member te - Pu Lalruatfela, Pu C. Lalkhawngaiha, Tv. Rinsailova Sailo, leh Nl. C. Zonunmawii, Venghnuai Branch leh T.Upa Malsawmtluanga, Asst Secy. NEICCYA, Mission Vengthlang te an kal.

❑ **Kohhran Hmeichhe Ni**

Nov. 25 (Zirtawpni) hi Kohhran Hmeichhe Ni vawi 26-na a ni a, Presbyterian Kohhran Hmeichhiate chuan hemi pual hian Bial leh Kohhranah tha an tih angin programme an hmang ang. Kumin Kohhran Hmeichhe Ni-ah hian thupui inang tlang Pi Zoramthangi Chhangte, New Capital Complex ziah "**Nute leh Fanau Enkawl**" tih chu an zir a ni.

Kohhran Hmeichhe Ni hi Kohhran Hmeichhe Inkhawmpui Lian-in Kohhran Hmeichhe Ni bik neih a rel a, Synod Executive Committee (SEC)-in November Zirtawpni hnunung ber hi Kohhran Hmeichhe Ni atan hman ni se tia a relsak angin kum 1997 atang khan hman tan niin Synod Calendar-ah pawh Synod Ni pawimawh zingah dah tel a ni.

Kohhran Hmeichhe Ni hmanpui turin Central Kohhran Hmeichhe Hruaitute hetiang hian an kal.

- Buhkangkawn Kohhran - Pi Sailuti, Chairman
- Kaisanary Kohhran - Dr. Lalthansangi Fanai, Asst. Secretary
- Pi H. Lalrintluangi, Committee member
- Pi Lalramzauvi, Committee member
- Pi Siampuii Pautu, Committee member

❑ **Prison Ministry**

Nov. 26 - 28, 2022 hian Lunglei District Jail-ah Gospel Crusade leh Synod Prison Ministry Sub-Committee din chungchanga inrawnkhawmna nei turin Rev. Lalhmuchhuaka, Director a kal.

❑ **Social Front**

♦ Nov. 26 & 27, 2022 hian Khawhai South Bial-ah Synod Social Front Campaign nei turin Campaigner te - Rev. Dr. F.H Liansangzuala, Dr. H. Saithantluanga leh Upa H. Lalsangzuala te an kal ang.

♦ Nov. 27, 2022 (Pathianni) hian Maubawk Bial-ah Political Education Campaign nei turin Campaigner te - Rev. Dr. K. Lallawmzuala, Rev. Dr. Lawmsanga, Rev. Lalrinmawia leh Pu R. Lalnunluanga te an kal ang.

❑ **Synod Relief Fund**

Tun hnaia harsatna hrang hrang nei te hnenah Synod Relief Fund atangin hetiang hian chhawmdawlina pek a ni.

S.No	Khua	Pek chhan	Chhungkaw zat	Pek zat
1.	Zemabawk South	Damlo	2	Rs. 16,000/-
2.	Mualkhang	In kang	1	Rs. 10,000/-
3.	Zemabawk East	Damlo	1	Rs. 8,000/-
4.	Zemabawk North	Damlo	1	Rs. 8,000/-
			BELHKHAWM	Rs. 42,000/-

- ❑ **NOVEMBER 25, 2022 (Zirtawpni) (FM Zoawi - Aizawl & Lunglei @ 7:30 p.m.):**
 Solo : Belinda L Sailo - Ka lo haw
 Zaipawl : Kawrthah Kohhran Zaipawl - Kan Lalpa Isua khawvela a len lai khan
 Thusawi : Rev. Zothansanga - Lungawina
 Solo : Felina Lalremruati - Ka lungawi zel ang
 Zaipawl : Leitan Bial Zaipawl - Mupui ang kohhran
- ❑ **Susamachar Prasaran Programme :**
NOVEMBER 27, 2022 (Pathianni) 5:00 pm. :
 Group/Choir/Solo : Bungkawm Masihi Sangati - Pyar ka sangar
 Group/Choir/Solo : Dawrpui Bial Masihi Sangati - Jaya
 Sermon : Rev. Lalthatluanga
 Group/Choir/Solo : Hmingtea Tochwawng - Aaya ishu mere jiwane me
 Group/Choir/Solo : Kristian Centre Zaipawl - Tu Pyar Ka Sagar
- ❑ **Moderator leh Executive Secretary-te Programme:**
Rev. Dr. Vanlalnghaka Ralte : Moderator
 Nov. 25, 2022 Noagang/Ambassa - Tripura Mission Field
 Nov. 26, 2022 Kanhmun Biak In thar hawn
 Nov. 27, 2022 Tanhril Kohhran (Zan)
 Nov. 28, 2022 OM
 Nov. 29, 2022 MPF & Political Party Leaders' Meet leh PBS Farewell & Dedication
 Nov. 30, 2022 Mamit Bazar Veng Kohhran Biak In thar hawn
 Dec. 2, 2022 Pastoral Committee
- Rev. C. Zoramawia : Senior Executive Secretary**
 Nov. 28, 2022 OM
 Nov. 29, 2022 MCC committee
 Dec. 2, 2022 Pastoral Committee
- Rev. V.L. Luaia Hranleh : Executive Secretary**
 Nov. 28, 2022 OM
 Nov. 30, 2022 SMTC-a zirtur interview
 Dec. 2, 2022 Pastoral Committee
- Rev. Dr. K. Lallawmzuala : Executive Secretary**
 Nov. 26, 2022 Social Front programme - Maubawk Bial
 Nov. 28, 2022 OM
 Nov. 29, 2022 MPF & Political Party Leader Meet leh Central KTP committee
 Nov. 30, 2022 Masihi Sangati Kendra Working committee
 Dec. 2, 2022 Pastoral Committee

PATHIAN THU ZIR DUH TAN

Presbyterian Bible School, Mission Veng-ah Certificate in Theology (C.Th) Admission hawn a ni a. Dil duhte tan a hnuai tarlan hi hriat tur a ni e.

- Admission Form : Office hun chhungin Rs. 10/- a lei theih a ni
 Dil hun chhung : December 13, 2022 (Thawhlehi) tlai dar 3:00 thleng
 Dil thei chin : Class VII passed, kum 16 chin, Kohhran dan chhunga awm
 Interview : December 16, 2022 (Thawhtanni) chawhma dar 10:00
 Class tan hun : January 12, 2023 (Ningani)
 Zir hun chhung : January - April, 2023

Hrechiang duh tan Phone No. **0389-2317343/8296035491**-ah zawh theih a ni.

Sd/-

Rev. Lalrinsanga
 Principal, PBS